

Ikastola handi gehienak pribatuan segitzeko erabakiak ari dira hartzen

Hala ere hilaren 25a arte ez da gehiengoaren erabakia ezagutuko

Atzo ilunabarrenean egitekoak ziren ikastoletako batzarrak arte ezagututako emaitzen arabera EAEko ikastola gehiago ari dira sare pribatuaren aldeko erabakia hartzen sare publikoaren aldekoa hartzen baino. Batzarrak gurasoen partehartze handiaz ari dira egiten eta hori nabarmendu dute Ikastolen Elkartek eta Hezkuntza Sailak.

JOXANJEL ALDAI / DONOSTIA

Nolanahi ere, oraindik ikastola asko gelditzen dira erabakia hartzeke dauden artean. Erabakia atzo arratsean hartzekoak 11 ikastola ziren Ikastolen Elkarteko iturrien arabera, eta gaur beste hainbestek egingo dituzte batzarrak. Hala ere, Eusko Jaurlaritzak erabakia hartzeko ezarritako maiatzaren 25eko (asteartea) epea gainera etorri arte itxaron beharko da ikastolarik gehien erabakiak ezagutzeko. Astelehenean batzarrak egitekoak dituztenak gutxienez 27 ikastola dira Ikastolen Elkartearen datuen arabera.

Ikastolen Elkartek emandako datuek erakusten dutenez, 10.764 ikasle biltzen dituzten ikastolek erabaki dute sare pribatuan gelditzea eta 7.465 ikasle dituzten ikastolek hartu dute sare publikorako bidea. Hezkuntza sailburu den Fernando Buesak ez zuen daturik eman nahi izan eta balo-



Santutxuko Karmelo ikastolako haurrak.

XOUSE SIMAL

✓ **Kooperatiba diren ikastoletan bazkideen bi heren behar dira jabetza al daketa erabakitzeke eta horrek lege arazoak sor ditzake.**

razio handiegirik ere ez zuen egin, «batzar eta bozketetan gure iritziak eraginik izan ez dezan».

Ikasle kopuruari begira Ikastolen Elkartek atzo eman zituen gutxi gora-beherako datuen arabera, Bizkaian artean % 50en erabakia falta zen, Gipuzkoan % 80ena eta Araban % 90etik gora ziren artean erabakia hartzeke zuten ikastolak.

Atzo iluntzera arte Araban ikastola bakarraren erabakia zen ezaguna, Laudiokoarena, eta berorrek sare pribatuan gelditzea erabaki zuen. Bizkaian sare pribatuan gelditzea ondoko ikastolek erabaki dute: Portugaletako Asti Lekuk, Galdakaokoak, Zornotzakoak, Santutxuko (Bilbo) Kirikiñok, Arrigorriakoak, Balmasedakoak, Gernikako San Fidelek eta Trapaga Aranekoak. Bizkaian publikorako bidea hartu dute, aldiz, Erandikoak, Eorrikoak, Gallartakoak, Santutxuko Karmelok, Abantokoak, Ugaokoak, Deustukoak (Bilbo), Bilboko San Inazioko Intxixuk, Leioako Gobelak, Ermukoak eta Sodupekoak. Gipuzkoako ikastoletatik pribatuan geldituko dira, Lazkaokoa, Donostiako Santo Tomas Lizeoa, eta Axular, Ber-

✓ **Atzo iluntzera arte 10.764 ikasle biltzen dituzten ikastolek erabaki zuten sare pribatuan gelditzea eta 7.465 ikasletako ikastolek publikora jotzea.**

garakoa, Billabonakoa eta Ibarakoa. Publikoan sartzea erabaki dute, berriz, Gipuzkoako beste ikastola hauek: Donostiako Ibai eta Aitorrek, Hernaniko Langilek, Beasaingoak, Errenteriako Langaitzek, eta Eibarkoak.

Ikastola hainbatetan lege arazoak ere ari dira sortzen erabakiak hartzeko. Izan ere, kooperatiba direnetan legeak bazkideen bi heren aldeko botoak eskatzen ditu jabetza aldatzeko. Ikastola batzuetan hori ez dute betetzen eta sare publikoaren aldeko erabakia oso alde txikiar hartu dute.

Iñaki Etxezarreta Ikastolen Elkarteko bozeramaileak batzar hauetan izaten ari den partehartze handia nabarmendu zuen atzo, eta herri honetan herriz herri hainbesteko partehartzea duten batzarrak egiteko gai den beste erakunderik ez dagoela azpimarratu zuen. Fernando Buesa Hezkuntza sailburuak ere antzeko balorazioa egin zuen eta bere ustez «partaidetza horrek agerian uzten du ikastola bakoitzak bere etorkizuna askatasun osoz erabaki dezakeela».

ELA: «Gobernuarekiko akordioak ikastola publikoen egonkortasuna bermatuko du»

G. AGIRRE / BILBO

ELAk eta Eusko Jaurlaritzako Hezkuntza Sailak sinatutako akordioak sare publikoan integrazteko erabakitzuten dituen ikastolek langileen egonkortasuna bermatzen duela adierazi zuten atzo sindikatuko ordezkariak.

Joan den ostegunean sinatu zuten akordioaren arabera, lanpostu finkodun irakasleak funtzionari bihurtu daitezke dagozkien proba mugatuak gaindituz gero.

Proba hauetako lanpostu kopurua, balizko partehartzaileen kopuruaren heinekoa izango da eta hauetan kontuan hartuko dira ordura arte eskainitako zerbitzuak. Probak gainditzen ez dituztenek gaur egun betetzen du-

ten lanpostuan jarraituko dute behin-betiko lan kontratuarekin.

Behin-behineko eta ordezkari langileek, bestalde, kontratuak irauten duen bitartean eutsiko diete lanpostuari. Irakasle hauek lan egindako denbora Administrazioari eskainitako zerbitzu gisa hartuko dute kontuan.

Plantilaren lekualdaketa beharrezkoa balitz, langilego finkoak gaurko ikastetxean jarraituko luke 1996-97 ikasturtea bukatu arte. Ondoren, langileen antzinakotasuna izango da kontuan lan mugikortasuna ezartzeko.

Akordioa Eusko Jaurlaritzako bi bazkideek «onartu» dutela argitu zuen ELAko Jesus Mari Larremendik, «negoziaketak EAJK proposatu baitzituen».

Ikastolen Elkartearen propo-

samenak sare pribatuan integrazten diren ikastoletako langileen egonkortasuna, «soberakinak direla medio», bermatzen ez duela adierazi zuen Larremendik.

Konfederakundearekin «negoziatzen jarraitzeko prest» dagoen ELAk bi eskakizun nagusi egiten ditu, batetik, langileek lan egiten ez duten denbora tarterako diru kutxa sortzea eta indarrean dagoen araudiak jasotzen dituen kalteordainak baino handiagoak finkatzea, «balizko kaleratzeak eragozteko».

LAB sindikatuak Elkartearen proposamena onartu izana salatu zuen, «interes sindikalak beharrezkoak nagusitu» direlako.

LAB sindikatuak Eusko Jaurlaritzaren jarrera gaitzetsi zuen,

batetik, akordioa «beranduegi» sinatu delako eta bestetik, «diskriminazio eta faboritismo politikoagatik». «Gobernuak LAB baztertu du, eztabaida prozesuan dauden ikastoletan gehiengo duen arren».

Akordioak «zenbait puntu interesgarri» ditu LABen ustez, lanpostuak ziurtatzea, prozedura edota subrogazioa. Hala ere, puntu «ilunak» ere badituela uste du, hala nola, ikastoletako irakas-kuntza ertainarekin zer gertatuko den ez argitzea eta trasladoetan ikastoletako langileak «bigarren mailako funtzionariak» izatea.

LABk Konfederakundearekin sinatutako akordioa «ELAk pribatuan onartu duena baino askoz hobea» dela esan zuten sindikatu abertzaleko kideek.

LABURREAN

ERTZAINTZAREN auto batek bost haur zapaldu zituen Tolosan

Ertzaintzaren auto batek Tolosako Laskurain ikastolako bost haur zapaldu zituen atzo goizeko bederatziak inguruan lapurreta bat gertatu zela adierazi zien dei bat jaso ondoren. Furgoneta batek Ertzaintzaren autoa jo eta azken haur espaloian sartu zen eta une horretan ikastolarantz zihoazen bost haur zapaldu zituen. Hamar eta hamabi urte bitarteko haurrek larritasun ezberdineko zauriak izan zituzten ●

BILBOKO TAOkoek greba egingo dute astelehenetik

Bilboko TAOko 98 langileek greba egingo dute datorren astelehenetik, maiatzak 24, ekainaren laua bitartean lan hitzarmenaren negoziaketan akordioa lortu ez dutelako. TAOko langileak Bilboko udaletxearen aurrean bilduko dira astelehenean goizeko hamaiketan udal agintariei irtenbide bat exigitzeko. Langileek jakinarazi dutenez greba dela eta, hiritarrek ez dute TAOko txartelik erosi beharko ●

SUMENDIK jardunaldiak antolatu ditu

Sumendik, Osasunaren Autogestioaren aldeko Elkargoa, 'Ekologia eta osasuna' izenburupean Osasun Alternatibaren III. Jardunaldiak ospatuko ditu Bilbon datorren astean zehar. Jardunaldiak Bidebarrietako udal liburutegian izango dira arratsaldeko zazpi t'erdietan. Hauen barruan, astelehenean, Antonio Palomar mediku higienista 'Osasuna ez da medikuen gauza' gaiaz mintzatuko da ●

HAMALAU milioi lagunek dute HIESaren birusa

Gutxi gora-behera hamalau milioi lagunek dute mundu osoan HIESaren birusa (GIB), Osasunerako Mundu Erakundeak (OME) eman berri dituen datuen arabera. Etorkizunerako eman dituzten datuak gainera, kezagarriagoak dira oraindik ere ●